

Хөөнә то өсгүлгәнә ик көрнө

А. МУХАРИНОВ,

балгьсна „Буратинский“ гидг совхозин директор

Мана совхозд мал икәр гарутв гидж үр Жезловин докладт заагддж келгдджәнә. Уннәс холд оч болшго: бидн муугьр көдлвдн. Мал гарутлгьн, нургьлдж хөд гарутлгьн — мана муугьр хәләдж хадгьлна учр болджана.

Ода эн дугу-дундс уурулгдджана. Түрүн болдж бидн мал хәләдж хадгьллгьиг ясрулвдн. Хөдчнрин болн үкрчнрин бригадсиг, хәрү газрун нүүдирцхәсн дамшлтта хальмг улсар батлвдн. Терүнлә зергддж, совхозин малмудин то икдүлхин эркд, эздүдәс малмуд хулддж авчанавдн. 200 шаху хө хулддж авбвдн. Дакад, багь гихдән 500 хө хулддж авхвдн.

Эн тавн джилә зуран чилгч күртг хөбнә тоог багь гихдән хойр холван икдүлхвдн. Эн джил малин то тавн миньгьн толгьа өсджәнә, эннө тегәд 30 процент өслгьн болдж гарчана.

Хө өсгүлгьиг болн ноос авлгьиг цаарандан икдүллгьнә хамгин ик көрнөгнө — үвләр малин төл авлгьн болджана.

Эн джил мана совхозд зуг негхн отарт, үр Шургучиев хөдчин бригадт, үвләр хургьлулгдх хөбдин көг тәвгдв. Кемрджән бидн хургьлх хөбдин цуг отармудиг үвләр хургьлулдг кехлә, ноос авлгьиг икдүлхин тускар партин болн правительствин тәвсн төриг хойр джилин эргцд күцәх бәәтхә, нам зөвәрт давулдж күцәдждадхиг эн бригадин дамшлтт үзүлджәнә.

Үр Шургучиев хөдчин бригад хургьлсн 100 хөн болгьнас 124 хургь авч, менд халгьлв. Тер хургьд цугтан бооджун, эрүл, сәәнәр өсджәнә. Ода теднә дундин чиньнүрнө 16-18 килограмм татцхана. Эдн март сард гарсн хургьд. Кемрджән февраль сард төл авсн болхла, энүнә үзмджнө улм деер болх билә. Үвләр гарсн хургьдиг тер джилин июль-август сард киргьджд болхмн, тиигәд хургьн болгьнас күсдундур — хойр килограмм ноос авч болхмн.

Совхозин партийн организац болн специалистнр хө өсгүлгь-

нә нүүрт йовгч эв-аргьиг, үлгүрнө мана совхозин хөдчнр дунд үвләр хө хургьлуллгьнә дамшлттиг өргнәр цәәлгьджд кеджд өгнә. Совхозд бәәх хургьлх 11 отар хөбнәс 7 отар хөбдиннө үвләр хургьлдгар көгинь тәвхәр шиидсн учрар, эн төрт ик оньган өгчәнәвдн.

Үвләр хөд хургьлулхин төләд траншейн кев-кецтә дулан хашас кеджәнәвдн. Ода деерән отар болгьнд неджәгьәд тиим хашас кеджәнәвдн. Тер хашас кехд бәәрн газрин материал икәр нургьлджд хулс олзлджанавдн.

Юн чигн кергиг күн, кадр күцәдмн гисиг тоолдж санад, мал өсгәчнр бәәх кесг гермүд бәрджәнәвдн. Эн джил багь гихдән 70 пәтр совхозин центральн усадьб деер, производственн участкар — фермсәр бәрдж дуусгдхмн.

Эн джил өвс хадлгьнә көдлмшлә зергджд өвс силосовать кегдджәнә. Саалин үкрмүд бәәдг газрт болн үвдән хургьлх хөд бәәх кошарин өөр 500 гар тонн сән силос тәвгдв.